

stadium conspicuum est,) ut discrimini amolendo adsint, significatio datur: inque omnibus cacuminibus altissimorum montium in aliis Orcadum insulis, strues talis, talem in usum, accendenda reponitur.

DAMSA.

Ad radicem hujus montis occidentalem jacet in mari prima borealium Orcadum insularum Damsa, Pomona propinqua, mille passus longa, & angusta, frugifera, herbida & piscatu non infelix, nullum in hac, ut nec in Holma vicina, Damsa paulo minor, animal venenatum, gignitur, ne vel mus aut sorex, & aliunde si importentur talia, statim aut moriuntur, aut in mare moribunda ruunt.

POMONA.

Pomona, qua in occidentem vergit à Kirewa, & utrinque multis in locis, in varios montes assurgit, & tamen frugifera est, cunctisque commoditatibus uberius pene, quam alia, in his oris insula, instructa. Parochias rusticas cum templis habet novem: Firtham, Stannes, (ubi Ballandinorum familiae aedes sunt sita,) ad lacum quatuor milliaria longum, & spatiosum, nisi prope ostium, qua, per pontem ligneum, vulgo *Waith* nuncupatum, transitur; troctarum seu trutarum, minorum salmonum magnitudine instar, aliorumque piscium, feracem: ex quibus sale conditis, plurimisque dolis inditis, aut ut fumo indurentur suspensis de trabibus, magna pars hyemalis opsonii constat. *Orfram*; *Harram*; ubi terra plana est, frugifera, & amena, & lingua Gothica maxime viget; *Strommes*, in qua, non longe à promontorio, cui vulgare nomen, *the blak Craige*, id est, nigrum saxum, sunt aedes elegantissimae, Grami, ultimi Orcadum episcopi, sumptibus exstructae, *Breches* vulgo dictae; *Sandwich*, ubi aliud quoque Domicilium cum sacello perelegans, ejusdem Praefulis impensis à fundamento erectum, prope lacum cygnis frequentatum. *Byrseam*, cum Baronia luculentissima, ad cujus maritimam oram occidentalem, prope peninsulam Burgum *Byrse* appellatam, situm est venustissimum Palatium, quadrato opere Monasterii in formam, cum fonte in area medio, cum duabus porticibus praelongis, varie depictis, praeter multa alia adpectu jucunda, affabre constructum. *Eriam*, *Rendelam*.

Totum occidentale littus Pomonae plurimis promontoriis, & rupibus arduis praecinctum, mare apertum spectat, nullis in eo, nec insulis, nec scopulis apparentibus. In diversis Pomonae locis, ut & in quibusdam aliis insulis Orcadum, Metalla sunt plumbi albi & nigri, tam probi, quam usquam in Britannia reperiuntur.

ALHALLOW.

Secunda borealis Orcadum insula est *Enballow*, exigua, in angusto, sed longe saevissimo mari sita, ad latus Pomonae, piscatu nobilis ob aestus utrinque praeterfluentis rapiditatem.

RAVSA.

Proxima Boream versus, interjecto angusto mari, est Rausa, octo millia longa, & sex lata,

vastis promontoriis multis & excelsis mare despicens, & in altissimos montes erica profunda & densa obductos, sese attollens; in littoribus aedificiis crebra, glebis, piscatu, cuniculis, avibus ericariis, & frugibus felix.

Hinc ad orientem, ultra mille passus est *Verra* (vulgo *Werr*) insula, bina milliaria longa, & angusta, frugum quam glebarum fecundior, cui defectui ex Rausa vicina succurritur.

Post Veram ad tria milliaria, orientem astitum versus, jacet *Gerfa* insula, cum holmis, sed una majore (vulgo *The Hen of Gerfa*, id est, Gallina *Gerfa* vocata) in altissimum Pyramidalem montem ascendens, & iisdem cum Rausa commodis abundans.

A *Gerfa* ad boream circiter tria milliaria est *Eglisa* (vulgo *Egilsa*), bis mille passus fere longa, & mille lata, frugifera, sed glebis vacua; quaeque utitur, ex Rausa scaphis, per mare aestu asperrimum, exportantur. Hic templum est cum turre acuminatim adscendente praeraltata, ubi sanctum Magnum, tutelarem divum Orcadum, fama est, esse sepultum; & aedes non longe à templo, pervenit.

Ab *Eglisa* ad orientem, *Siapinsa* (vulgo *Shapinsa*) insula ex adverbo Cracovica, unde ad tria milliaria distat, est sita, ipsa sex millia longa, & tria fere lata. Portum habet (*Ehwick* cui nomen) satis commodum, & Holmam prope, *Elgerholm* dictam, largam & herbidam. Ipsa *Siapinsa* aedificiis variis, sed imprimis Domicilio, vulgo *Sound* dicto, gaudet. ut & ericetis, in quibus optima glebae, & aves ericae inveniuntur. Tota est fere plana & humilis, singularem habet Ministrum sibi assignatum.

Hinc ad occasum hibernum, circiter quinque milliaria, saevissimo & exultim sese attollente mari, jacet *Fara* Septentrionalis, tres fere mille passus longa, sed arcta, rara aedificiis, commodisque, pro more Patriae non infelix, Holmasque herbidas duas videre est inter eam, &

*Wastram* (à qua ad tria milliaria distat) insulam, omnium Orcadum maxime occidentalem, unde & nomen sumpsit. Octo millia passuum longa, alicubi quinque, alicubi vero tria lata. Variis promontoriis, aliis altioribus, austrum & occasum versus, aliis autem humilioribus, praecincta. In truculentissimo mari posita, crebra rusticis aedibus, castello validissimo, (*Nautland* vulgo) ornata. Ericetis, cuniculariis optime refertis, *Nautstathmo*, (*Fer-vo* qui dicitur) piscatione, frugibus, multisque aliis commodis, praecipue generosi animi viris, nulli Orcadum insulae cedens.

Hinc ad boream, ad duo prope milliaria, est *Papa Wastram*, & ipsa ter mille passus fere longa, mille & quingentos lata; portu satis commodo, inter insulam ipsam, & vicinam Holmam ornata: frequenter satis incolitur, commodisque, qualibus ipsa *Wastram* major fruitur,